

KPDNHEP siasat kenal pasti pihak salah guna AP

Putrajaya: Kementerian Perdagangan Dalam Negeri dan Hal Ehwal Pengguna (KPDNHEP) akan melakukan siasatan bagi mengenal pasti sama ada wujud tindakan pihak tertentu menyalahguna Permit Kelulusan (AP) mengimport produk makanan terutama tepung dan gula.

Timbalan Menteri, Chong Chieng Jen, berkata tindakan pastinya dikenakan terhadap pihak yang menyalahguna AP yang diberikan.


“Buat masa ini, kami belum terima apa-apa laporan berkaitan salah guna AP di bawah kementerian ini. Kalau ada, pastinya pegawai KPDNHEP diarahkan untuk melakukan siasatan lanjut.

“Contohnya bagi AP gula, tiada laporan salah guna. AP yang dikeluarkan adalah berdasarkan jumlah keperluan yang mahu diimport sahaja oleh pengeluar makanan dan minuman. Untuk AP barangan lain, saya tidak boleh ulas kerana di bawah tanggungjawab kementerian lain,” katanya.

Beliau berkata demikian pada sidang media selepas merasmikan National Art Competition 2019 (NAC2019) anjuran Global Art & Creative Sdn Bhd, di sini, semalam.

Chieng Jen berkata, Kajian Pasaran Sektor Makanan oleh Suruhanjaya Persaingan Malaysia (MYCC) baru-baru ini, mendapati wujud salah laku dalam AP mengimport kubis bulat apabila ada yang mengambil untung ‘atas angin’ dengan menyewakan permit itu kepada peniaga lain.

“MYCC sendiri sudah memberi cadangan kepada kerajaan supaya pemberian AP ini dilihat semula, tapi AP ini (import kubis bulat) di bawah bidang kuasa kementerian lain, bukan KPDNHEP,” katanya.

 **Contohnya bagi AP gula, tiada laporan salah guna. AP dikeluarkan berdasarkan jumlah keperluan mahu diimport sahaja oleh pengeluar makanan dan minuman.**

Chong Chieng Jen,
Timbalan Menteri
Perdagangan Dalam Negeri
dan Hal Ehwal Pengguna